


**TEZAUUR LITURGIC**

**29 MAI**

**ACATISTUL  
SF. CUVIOASE  
DOMNICA  
LIKVINENKO  
DE LA  
ALEȘKOV**



**MOSCOVA, 2000**



# **Акафист блаженной ДОМНИКЕ АЛЕШКОВСКОЙ**

## **Кондак 1**

Избранная угоднице Христова и дивная  
благочестия наставнице, / в земли Херсонстей  
подвигом добрым подвизавшаяся, / святая  
блаженная Домнико, / хвалебныя пения  
приносим ти, молитвенницы твои; / ты же, яко  
имущая дерзновение ко Господу, / Того моли  
помиловати нас, чтущих святую память твою / и  
с верою и любовью взывающих ти: / Радуйся,  
святая блаженная Домнико, молитвеннице о  
душах наших.

## **Икос 1**

Ангелом подражати в земном житии своем  
восхотевши, о чистоте душевной и телесней  
возревновала еси, блаженная Домнико, и  
благочестно житие поживши, венцем нетленным  
от Бога увенчалася еси, и ныне в Небесных  
обителех со Ангелы ликовствуя, молися за ны,  
сиде тебе поющих:

Радуйся, земли Херсонския похвало.

Радуйся, всех православных радование.

Радуйся, от младенчества в любви к Богу воспитанная.

Радуйся, во след за Христом радостно потекшая.

Радуйся, мирского треволнения избегшая.

Радуйся, тихаго пристанища взыскавшая.

Радуйся, святая блаженная Домнико,  
молитвеннице о душах наших.

### **Кондак 2**

Видя красоту Небесную обители Печерския и ведая о богоугоднем житии преподобных отцев ея, ихже души в Горних селениях ныне веселятся, телеса же, подвиги многими утружденные, в пещерах нетленно почивают, вожделе еси, блаженная мати, подражая им, во обители святей подвизатися, да с лики преподобных купно воспоеши во Царствии Отца Небеснаго: Аллилуия.

### **Икос 2**

Разумея молитвенное предстательство угодников Божиих за род христианский, ко святителю Николаю, скорому защитнику сирых и обидимых, молитвы твоя возносила еси,

богомудрая Домнико. Мы же такожде на молитвенное заступничество святых уповая, со умилением зовем ти сице:

Радуйся, в сиротстве своем покровительством угодников Божиих утешавшаяся.

Радуйся, житиями святых в добродетели утверждавшаяся.

Радуйся, от ранния юности службы Божественныя возлюбившая.

Радуйся, молитвою непрестанною услаждавшаяся.

Радуйся, смирения исполненная.

Радуйся, послушанию навывшаяся.

Радуйся, святая блаженная Домнико, молитвеннице о душах наших.

### **Кондак 3**

Силою благодати Божия влекома, во обитель Алешковскую притекла еси, блаженная Домнико, желая мир греховный оставить и Господу неленостно работати, поя Ему: Аллилуия.

### **Икос 3**

Имея велие усердие к молитве, псалмы Давидовыми и акафистным пением душу свою услаждала еси; монастырския же послушания со тщанием исполняючи, образ всем смирения и терпения явила еси. Сего ради приими от нас похвалы сия:

Радуйся, псалмопением непрестанным душу свою умилавшая.

Радуйся, Господа всяческих выну славословившая.

Радуйся, во обители Пресвятыя Богородицы добре потрудившаяся.

Радуйся, послушание игумении и сестрам во всем явившая.

Радуйся, молитву и труд в себе дивно сочетавшая.

Радуйся, примером послушания воле Божией бывшая.

Радуйся, святая блаженная Домнико, молитвеннице о душах наших.

### **Кондак 4**

Бури мирския суеты не возмогоша поколебати  
тя, святая Домнико, возлагая бо все упование  
свое на Господа и на Пречистую Его Матерь, яко  
адамант тверд в вере пребыла еси; житие же  
свое во обители Алешковстей провождаючи,  
молитвою пред иконою Божия Матери  
Феодоровскою дух свой укрепляла еси,  
непрестанно поя Богу: Аллилуия.

### **Икос 4**

Слышаще вси и видяще дивное и слезное  
моление твое, блаженная, за обитель, егоже ты в  
уединении с воздетыми горе руками возносила  
еси, зело удивляхуся; обаче, егда наста время  
гонений от безбожных, уразумеша тогда о  
скорбех, на обитель и насельниц ея грядущих.  
Мы же, воспоминаая сие, глаголем ти сице:

Радуйся, скорби, на обитель грядущия,  
духовными очима своими зревшая.

Радуйся, грядущая, яко близ сущая,  
созерцавшая.

Радуйся, страдания и лишения безропотно  
переносившая.

Радуйся, за обидящих тя слезно молившаяся.



Радуйся, на Господа все упование свое возлагавшая.

Радуйся, призыванием Сладчайшего имени Иисусова присно утешавшаяся.

Радуйся, святая блаженная Домнико, молитвеннице о душах наших.

### **Кондак 5**

Боготечная звезда явилася еси, блаженная Домнико, во дни лютых испытаний и гонений: сестры бо своя, во изгнании сущия, непрестанно утешала еси, и всех приходящих к тебе жизнь свою в руце Божии вверить наставляла еси, взывая с верою: Аллилуия.

### **Икос 5**

Видя Всеблагий Господь молитвенныя подвиги и добродетельное житие твое, блаженная мати, посла тя людем Своим во время тяжкия скорби во утешение. Ты же, созерцая невидимое, яко видимое, и грядущая, яко настоящая, нуждающимся советом благим помогала еси. От нас же приими пения сия:

Радуйся, скорбных и печальных утешение.

Радуйся, вдов и сирот благое попечение.



Радуйся, странных и обуреваемых готовое пристанище.

Радуйся, немощных и убогих присное вспоможение.

Радуйся, заблуждших на путь добродетели наставляющая.

Радуйся, ищущим спасения путь в Царствие Небесное указующая.

Радуйся, святая блаженная Домнико, молитвеннице о душах наших.

### **Кондак 6**

Проповедуют святость жития твоего, блаженная Домнико, избавлении тобою от бед и напастей. Темже и мы, прославляюще Бога, даровавшего нам таковую усердную молитвенницу о нас, грешных, вопием Ему: Аллилуия.

### **Икос 6**

Возсияла еси светом праведнаго жития твоего, богоблаженная, в земли Херсонстей: в посте и воздержании, в ночных бдениях и псалмопении пожила еси, благочестию и смирению всех поучаючи, да и мы, тобою на путь спасения наставляеми, ублажаем тя:

Радуйся, праведнице, от Бога нам дарованная.

Радуйся, сердцем чистым Богови молитвы возносившая.

Радуйся, Божия благодати цельбоносный источнике.

Радуйся, посреде напастей нас не оставляющая.

Радуйся, вопрошаемых мудрая советнице.

Радуйся, заблуждающихся и в недоумении сущих добрая вразумительнице.

Радуйся, святая блаженная Домнико, молитвеннице о душах наших.

### **Кондак 7**

Хотяй спасти тобою многия Владыка Христос во времена сия последняя, даде тебе нам, блаженная Домнико, во образ праведности и долготерпения: ты бо крест свой безропотно несла еси чрез скорбное и многотрудное житие твое, поучаючи приходящих к тебе в теплоте сердечней воспевати Богу: Аллилуия.

### **Икос 7**

Новую наставницу и молитвенницу яви ты Господь людем Своим, преподобная мати, яко

подвиги твоими и чудеса всю землю  
Херсонскую облистала еси. Мы же, благодаряще  
Бога за сие милостивное о нас промышление,  
сие зовем ти:

Радуйся, в Небесней славе Ангелом  
уподобившаяся.

Радуйся, благая утешительнице всех в молитве к  
тебе притекающих.

Радуйся, в терпении твоём свыше укрепленная.

Радуйся, показующая нам образ кротости и  
незлобия.

Радуйся, вся красная мира сего ни во чтоже  
вменившая.

Радуйся, Промыслу Божию всецело себе  
предавшая.

Радуйся, святая блаженная Домнико,  
молитвеннице о душах наших.

### **Кондак 8**

Странно и дивно бе житие твое, имже  
утверждала еси веру и упование в людех, многия  
бо от сна греховнаго возставляла еси к  
покаянию: овим исцеление подающе, овим же  
скорую кончину возвещающе, иных же тайныя

помыслы обличающе. Темже молим тя, Домнико блаженная: просвети тьму нашего маловерия, наставляющи нас к доброделанию, да на Страшнем Суде Христове не постигнет нас участь шуияго стояния, но да со избранными сподобимся Всемогущему Богу взывать: Аллилуия.

### **Икос 8**

Вся любви Божественныя исполнена была еси, святая Домнико, скорбящих утешающи, немощных защищающи, нищих ущедряющи, заблуждших на путь спасения наставляющи. Сего ради приносим ти таковая:

Радуйся, правды Божия нелицеприемная возвестительнице.

Радуйся, немудрых богомудрая наказательнице.

Радуйся, по морю житейскому нас путеводящая.

Радуйся, к подвигам благочестия всех призывающая.

Радуйся, стяжавшая к Богу велие дерзновение.

Радуйся, с верою прибегающим к тебе присное утешение.

Радуйся, святая блаженная Домнико,  
молитвеннице о душах наших.

### **Кондак 9**

Всякия претерпела еси в житии твоём скорби,  
гонения, поношения и болезни, ныне же на  
Небесех о Господе радуясь, молися за ны,  
преподобная Домнико, да и мы безропотно и  
смиренно скорби и вся злая, нам бываемая,  
переносити возможем, Господу за вся поющи:  
Аллилуия.

### **Икос 9**

Ветии многовещаннии недоумеют по достоянию  
восхвалити тя, блаженная, ибо многая и  
преславная чудодействия еще в житии твоём  
явила еси и по преставлении твоём благодатию  
Божиею творити сия не престаеши. Мы же, на  
помощь твою уповающе, благодарно взываем ти:

Радуйся, преподобная мати, памяти благия  
достойная.

Радуйся, по блаженней кончине твоей Богом  
возвеличенная.

Радуйся, с девствующими, яко девственница,  
прославленная.

Радуйся, Небесного крова взыскавшая и получившая.

Радуйся, в чертог Небесного Жениха во гласе радования возшедшая.

Радуйся, прославляти и благодарити за вся Господа нас вразумляющая.

Радуйся, святая блаженная Домнико, молитвеннице о душах наших.

### **Кондак 10**

Спасения залог, Православную веру, до конца дней своих сохранила еси в сердце своем, блаженная Домнико, темже молим тя: от всяких ересей и расколов нас соблюди и помози нам в Православии непоколебимо пребывати и верно пети Богу: Аллилуия.

### **Икос 10**

Стеною молитв твоих, всехвальная мати, огради нас от всякаго душевреднаго искушения диавольскаго, яко тебе дарова Преплагий Бог в покров и защиту душам и телесем нашим. Темже убо просим тя: помози нам во всякой скорби и обстоянии, сие тебе вопиющим:

Радуйся, путь смирения во спасение нам  
указующая.

Радуйся, образ терпения и незлобия нам  
являющая.

Радуйся, потемненныя очи душ наших  
просвещающая.

Радуйся, страсти наша Небесною прохладою  
орошающая.

Радуйся, к тихому пристанищу нас приводящая.

Радуйся, предстательнице наша в бедах и  
напастех.

Радуйся, святая блаженная Домнико,  
молитвеннице о душах наших.

### **Кондак 11**

Пение всеумиленное приносим ти, угоднице  
Божия Домнико, мы, недостойнии, от тебе  
чающе милости получитьи; ты же посети нас и  
данною ти от Бога благодатию исцели,  
вопиющих: Аллилуия.

### **Икос 11**



Светом Тройческим осияваема, со всеми святыми предстоиши ныне на Небеси Престолу Царя царствующих, Домнико преподобная, и оттуду, яко светозарное светило, просвещаеши землю Херсонскую, разгоняючи мрак заблуждений и указуючи путь к Небесному блаженству. Сего ради прославляюще тя, глаголем:

Радуйся, Царство Небесное унаследовавшая.

Радуйся, Солнцем Правды озаренная.

Радуйся, свеще, горением к Богу сердца наша возжигающая.

Радуйся, мир Божий в души людей приносящая.

Радуйся, яко тобою имя Господне во всех пределах земли наша прославляется.

Радуйся, яко тобою свет любви Божия всюду осиявается.

Радуйся, святая блаженная Домнико, молитвеннице о душах наших.

### **Кондак 12**

Благодать, данную ти от Бога, и велие сострадание твое к страждущим, богоблаженная Домнико, ведуще, светло празднуем святую

память твою, и тебе, покровительнице нашей, молебны похвалы возносяще, поем Всещедрому Богу: Аллилуия.

## **Икос 12**

Поюще многочудесное прославление святых мощей твоих, исповедуем неисчетная твоя благодеяния, явленная и присноявляемая тобою всем с верою и любовью к тебе притекающим, ихже не лиши и нас, смиренных, упование на тя возложивших и тако тебе вопиющих:

Радуйся, яко на Небесех ныне пред Господом предстоиши.

Радуйся, яко о людех пред Богом выну предстательствуеши.

Радуйся, града твоего крепкое ограждение.

Радуйся, земли Херсонския незыблемое утверждение.

Радуйся, чтущих память твою пред Богом поминающая.

Радуйся, о прославляющих тя Господа умоляющая.

Радуйся, святая блаженная Домнико, молитвеннице о душах наших.

## Кондак 13

О прехвальная угоднице Божия, блаженная мати Домнико, приими смиренное сие хваление наше и твоим теплым предстательством у Царя Славы испроси нам в немощех исцеление, в добродетелех преспеяние, от врагов видимых и невидимых избавление, от вечныя муки освобождение и Царства Небеснаго наследие, да с тобою присно поем Богу: Аллилуия.

(Этот кондак читается трижды, затем икос 1 и кондак 1)

## Молитва

О достоблаженная мати Домнико, ты ныне душою на Небеси пред Престолом Божиим предстоиши, телом же на земли почиваеши и данною ти свыше благодатию различная чудеса источаеши! Темже взирающе на святой твой образ (*и предстояще раце честных мощей твоих*), радуемся о преславнем скончании жительства твоего и чтим святую память твою. Ты же, предстоя Престолу Божию, услыши нас, грешных, молящихся тебе, приими молитву нашу и принеси ю ко Милостивому и

Человеколюбивому Спасителю нашему. Испроси нам у Христа Бога мирное и безмятежное житие, здравие душевное и телесное, земли благоплодие и во всем всякое изобилие и благоденствие, да сподобимся предстательством твоим, аще и недостойнии есмы, видети благая на земли живых, славяще Единого во святых Своих славимаго Бога, Отца и Сына и Святаго Духа, ныне и во веки веков. Аминь.



ПОЛНЬІЙ  
**АКАФИСТНИК**  
КАНОНИЧЕСКІЙ

АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ

І

НЮКЕ  
\*НЕБО